

**Statementu husi Sociedade Sivil iha Timor-Leste ba  
Loron Internasional ba Luta Agrikultór sira nian**

Abril 17, 2009

Iha 1996, Movimentu Internasional ba Agrikultór sira, La Via Campesina deklara loron 17 Abril loron internasional ba luta agrikultór sira nian. Data ne'e hili atu hanoin hikas ba agrikultór la iha rai husi Movimento dos Trabalhadores Rurais Sem Terra nain 19, ne'ebé polisia Brazil oho bainhira sira koko atu asesu rai. Ami expresa sentimentu solidaridade ba agrikultór sira iha mundu tomak no hakarak hanoin ba experiencia iha Timor-Leste, rai ne'ebé povu maioria moris nudar agrikultór ki'ik.

Kolonializmu no okupasaun halakon ai-laran, estraga rai, haketak ema husi sira nia rai, halo kampaña propaganda atu promove ai-han Indonesia-nian no halo luta sistemátiku kontra agrikultura no ai-han lokal. Ohin loron prosesu dezvoltamentu tuir deit ita nia mehi, la haforsa bu'at ne'ebé forte ona, entaun la fo fokus ba agrikultór sira.

Fo subsidiu ba fo'os importa ho kuantidade ne'ebé bo'ot liu fali ai-han nebe ita kuran, hamate agrikultura lokal. Politika ne'e la ajuda ema ki'ak sira iha area rurais ne'ebé fos ne'e la to'o ba sira, no maski fos ne'e to'o ba sira, sira laiha kbiit atu sosa. Intereses estranjeiru dudu agrokombustivel no cash crop (Ai-horis/ai-han ne'ebe kuda atu fan deit), iha doadores balu uza programa ajuda nian atu kria dependénsia ba sira nia produsus, hanesan fini hibrida, ameasa ita nia produsaun ai-han. Agrikultura industrial ne'e la sustentável, no labele fo moris ba ema Timor ba aban-bainrua nian.

Treinamentu ba téknika permakulutra/agroekolójiku mak métodu ida ne'ebé fasil no baratu atu haforsa qualidade rai, maneja peste, rezultadu produksaun, qualidade fini no preservasaun ba ai-han. Ne'e haforsa comunidade, no hamenus dependénsia ba konselheiru estranjeiru. Ne'e strategia ida atu haforsa ita nia soberania aihan no hamenus impaktu folin ai-han ne'ebé sae iha merkadu internasional ba Timor-Leste.

Ami agradece ba agrikultór Timor-Leste nian sira, tanba sira fo ai-han lor-loron ba populasaun maioria iha Timor-Leste. Sira mak pilar ba ekonomia lokal laos minarai nian. Maski seidauk perfeitu, ita nia prosesu agrikultura sustentável diak liu husi nasaun seluk. Ne'e tanba ita nia agrikultór sira iha matenek tékniku maka'as kona ba kuda ai-horis no téknika seluk.

Iha tinan oin mai, mudansa ba prosesu rai husi programa registrasaun *Ita Nia Rai* no lei ba rai foun hanesan Código Civil no Lei Transitorio ba Rai, sei lori impaktu bo'ot ba sociedade hotu iha Timor-Leste, liu-liu agrikultór sira. Ita nia agrikultór sira presiza rai atu halo to'os no natar.

Ita hein katak Timor-Leste la hetan experiencia hanesan nasaun barak, inklui Brazil, ne'ebé ema barak la bele asesu rai – maski rai ne'e husik le'et hela deit no sira hamlaha hela.

Globaliza Luta!  
Globaliza Esperansa!